

東
華
續
錄

東華續錄

嘉慶三

臣王先謙敬編

臣周馥恭校

嘉慶二年丁巳春正月乙巳諭軍機大臣等明亮等拏獲首逆石
三保家屬並查拏賊目雇得保等分別辦理所奏甚是見在止有
吳廷英吳廷玉及吳八月家屬尙無下落想亦易於查拏計此旨
到時疏通大路各事宜辦理已竣畢沅亦可到彼姜晟見抵乾州
明亮即可將後路各事交與畢沅鄂輝姜晟查照和琳奏定章程
以次妥辦明亮仍著帶應撤川兵迅往太平東鄉一帶額勒登保
德楞泰探聽湖北黃柏山及鍾祥何處亟須添兵卽迅往該處或
分赴長陽鍾祥上緊勦辦將此各傳諭知之○丙午命兩江總督
蘇凌阿回任以台布署江西巡撫由戶部侍郎署○己酉調傅森爲兵部

侍郎

由盛京刑部侍郎調

○庚戌諭軍機大臣等吉慶等審辦海洋盜犯一

摺內稱察訪江坪地面係閩粵民夷雜處勾結爲匪如有應行知會安南之處臨時再繕發照會等語細思事有所難如該國王果不知情自可照會接捕今據拏獲夷匪羅亞三等供稱安南烏膺有總兵十二人船一百餘號並據起獲印記是此項烏膺夷匪皆得受該國王封號其出洋行劫似該國王非不知情若令會合拏賊彼豈肯聽從且內地民人出洋爲匪尙不能官爲禁止何況外夷儻安南藉詞抵飾何從與之分辨又豈值因此生費興師征討該國耶吉慶等惟當於閩粵浙江三省洋面飭屬會擒遇有外洋駛入夷匪無論安南何官卽行嚴辦再此後拏獲安南盜匪審明後當卽正法毋庸解京以省驛站解送之煩○癸丑諭據吉慶等奏校閱各標營官兵一摺內稱見值冬深閱兵之期查閱內河水

師弁兵駕駛便利在船施放槍礮尙屬熟練水爬桅亦屬嫺習等語此語不通粵東氣候雖屬和暖但水性寒冷且正屆隆冬之時令人赤身入水究未免不近人情官兵等若遇追捕洋盜卽赴水擒捉亦分所當然至於尋常操演自應按時練習卽如該督所奏駕駛兵船施放槍礮及爬桅等技藉以操練武備則可至於水一節行之冬令殊無此理該督等若故令兵丁等冒寒入水固覺太不體恤儻並無其事僅以一奏塞責尤屬具文非是嗣後沿海地方如尋常操演爬桅等技藝仍照常演習外至冬令水斷不可行以示朕體恤水師準情酌理之意將此通諭有水師省分各督撫知之○福甯等奏攻奪黃柏山賊卡得旨獎賚賞兵丁一月錢糧○乙卯姚學瑛革職逮問以先福爲陝西按察使

由甘肅肇秦階

道○己未諭軍機大臣等觀成等奏賊匪復犯東鄉官兵眾寡不

敵致被搶占並戕害文武各員竟不成事此時兵力既不敷調撥
惟當加意固守轉不得冒昧前進致有損失卽宜綿所帶兵力亦
屬無多仍須慎重前所調陝甘兵丁應卽催令速赴昨已令明亮
額勒登保德楞泰前赴襄陽今東鄉尤爲緊要著明亮德楞泰二
人將四川應撤兵先帶數百名馳赴東鄉餘另派將領分起續往
至惠齡一路卽著額勒登保帶撤回湖北兵丁速赴襄陽庶兩處
皆有多兵可期迅速集事○庚申調德瑛爲盛京刑部侍郎以寶
源爲盛京禮部侍郎由左副都御史遷○壬戌改建貴州銅仁府屬喚腦
石城○明亮等奏擒獲首逆吳廷玉吳廷英等押赴平隴正法得
旨嘉獎○甲子張朝綱緣事革職以楊揆爲甘肅布政使張繼辛
爲四川按察使由貴州貴西道遷○乙丑宜縣奏攻克太平通天觀斬賊
首黃自榮等得旨獎賚賞兵丁一月錢糧○惠齡等奏進剿禹山

等處賊匪得旨嘉獎○丁卯諭軍機大臣等據馮光熊奏南籠府
种苗滋擾馳赴查辦該處种苗糾眾焚搶自係與湖南苗匪氣類
相通勾結竊發此時馮光熊雖已前往但貴州苗疆關繫緊要一
切調度機宜恐馮光熊一人照料難周見在黃柏山賊匪已經官
兵連奪賊卡卽日殲除無須勒保在彼幫辦著卽輕騎減從馳赴
南籠不必再帶攻勦黃柏山之兵至黔省見調官兵尙恐不敷並
著珠隆阿張玉龍卽將應撤回貴州之兵速行帶領前赴南籠或
再將他省應撤之兵酌帶一二千名總當星速勦捕以期蒞事
勒保傳王囊仙者故洞溪寨苗婦富丈寨苗草七格髮以囊仙有
幻術羣苗信之推爲首以作亂分遣賊黨大王公李阿六王抱羊
等圍南籠府及府屬之永豐黃草壩捧鮮新城冊亨○戊辰上
安順府屬之永甯歸化各城冊亨旋被陷滇黔道梗○
奉 太上皇帝命賜暹羅國王鄭華教諭曰九服承風建極著會
歸之義三加錫命樂天廣怙冒之仁舊典爲昭新綸用沛爾暹羅

國王鄭華屢供王會久列藩封茲於嘉慶二年復遣使臣奉表入貢鑒其忱悃允荷褒揚至以天朝疊慶重釐倍呈方物具見國王輸誠效順弗懈益虔實屬可嘉國家厚往薄來字小柔遠自有定制第念爾國僻處海陬梯航遠涉業經備物呈進若從擴卻勞費轉多是以特飭所司將此次所進貢物俱行收受加賜國王文綺等件嗣後止須照常呈進一分毋庸增添如國王仍前備進兩分卽飭廣東督撫發還一分以昭定制而示體恤王其祇承眷顧益懋忠純永膺蕃庶之恩長隸職方之長欽哉特諭○庚午成都將軍觀成等奏逆首徐添德自焚掠東鄉後近又密行勾結巴州所屬之方山坪王家寨等處賊匪將達州至太平大路阻塞諭軍機大臣等見在索費英阿帶兵由太平前至達州城池糧道均可無虞前據宜縣等已將太平等處賊匪剿淨前赴東鄉正可沿途剿

殺肅清大路而興漢鎮文如文已到營朱射斗所帶川兵計日亦到軍威壯盛想宜縣觀成等見已會商夾攻收復東鄉縣治徐添德既爲首惡著宜縣等留心擒獲儘能生擒解京盡法處死尤足快人心而抒眾憤

二月癸酉

上御經筵○以曹城爲內閣學士

由詹事選

○江南鹽工

合龍加李奉翰太子太保○甲戌調熊枚爲安徽布政使以陳孝

昇爲雲南布政使孫藩爲雲南按察使

由陝西糧道遷

○戊寅未刻 皇

后崩

上至吉安所臨奠○諭本日

皇后薨逝一切典禮仰蒙

皇父太上皇帝特降

敕旨加恩照皇后例舉行第思朕日侍

聖慈一切稟承

睿訓所有輟朝期內各衙門章疏及引見等

事仍著照常呈遞王公大臣官員等雖有素服之例但皇后冊立

甫及一年母儀未久且昕夕承

歡諸取吉祥此七日內圓明園

他日奏事之王大臣等及引見人員俱著常服惟不挂珠此禮以義起天下臣民等自當共喻朕崇奉 皇父孝思敬謹遵行副朕專隆尊養至意○惠齡等奏獲首逆劉起榮解京諭軍機大臣等此次惠齡等所辦甚好惠齡恆瑞慶成舒亮巴克坦布阿爾薩朗碩雲保訥音富成德齡德光馬瑞明泰著賞給金合銀絲合大小荷包以示獎勵至慶成年少高興前經有旨令惠齡查奏遣令回京今劉起榮係慶成射中腰開始行落馬看來慶成自知改悔竟能奮勇出力著仍留軍營帶兵見在賊匪經官兵分路圍剿並臨陣生擒首逆賊人自聞風膽落惠齡等惟當乘賊情窘蹙之際鼓勵兵弁上緊兜圍將首逆姚之富張富國悉行擒獲自可剋日蕩功○辛巳景安奏擒剿浙川內鄉未及起事教匪首逆王佐臣等得旨嘉獎賞雙眼花翎晉封三等伯爵○壬午殷奠 大行皇后

上至吉安所奠酒○癸未原任陝西按察使姚學瑛以贓伏法

○甲申奉移 大行皇后梓宮於靜安莊 上親臨目送是日

上除服○丙戌移湖廣提督駐辰州增設永綏鎮總兵官駐花園

汛○己丑撥部庫銀二百萬兩備湖北軍需○辛卯子陝西興安

府屬被賊難民口糧籽種並修屋銀○壬辰 上奉 太上皇帝

命詣 黑龍潭祈雨○是日雨○癸巳改四川綏甯營參將爲綏

甯協副將增設遊擊都司各一守備二○乙未廣西西隆州惡稿

苗匪滋事命吉慶等勦之○惠齡等奏勦殺襄陽鄭家河賊匪得

旨嘉獎賞雙眼花翎○丙申大祭 大行皇后 上至靜安莊奠

酒○丁酉綏徵湖北承辦兵差之武昌等十九州縣新舊額賦○

宗人府奏請貝勒德麟世襲封爵得旨德麟所襲之爵伊子承襲

貝子伊孫承襲鎮國公減至不入八分公止世襲罔替○福甯奏

黃柏山賊勢窮蹙經成德等帶兵截殺攻取夜遊山一帶山梁賞
兵丁一月錢糧○戊戌 上奉 太上皇帝命 賜 大行皇后
諡曰 孝淑皇后

三月甲辰 上恭送 太上皇帝幸盤山○免經過地方額賦十
分之三○ 上啓鑾謁 西陵○免經過地方額賦十分之三○
戊申 上謁 泰陵 泰東陵回鑾○乙卯諭軍機大臣等慶成
奏追剿東竄賊匪情形所辦甚好該處竄匪經慶成等分路截殺
惠齡等在襄陽一帶迎頭撲擊正可兩面夾攻賊匪前在雙溝地
方布散逆詞內有姚張王黎四姓之語本日軍機大臣審訊河南
解到之劉起榮楊應邦二犯供稱姚張二姓卽係姚之富張富國
其黎姓係名黎樹賊夥稱爲黎叔王姓稱爲大叔更在姚之富等
之上該二犯俱係隨州大頭目根究明白更可易於蹤迹惠齡等

務須按名拏獲毋致漏網○畢沅等奏湖南投誠入伍苗兵不下三萬餘人均仰給於官爲日已久此時大功告竣自應裁撤令其耕耘復業臣等酌議量予牛具籽種俟秋收後再行以次酌裁仍擇其出力較著艱苦最甚者酌留萬餘名派給各苗弁管領以供差喚每名月給工食銀五錢一二年後再逐漸裁革從之○丁巳

上侍

太上皇帝還京師○戊午以瑚圖靈阿爲左副都御史

由通政使遷

○己未諭喀申和卓前因捏病僅予罰俸乃至今並未當

差昨特遣烏爾圖納遜阿蘭保傳喚喀申和卓仍稱未愈不到因將喀申和卓革去公爵侍衛仍遣烏爾圖納遜阿蘭保鎖拏來圍交御前大臣等嚴訊一介回奴如此荒唐若不重加懲治何以警眾著將喀申和卓重責二十板拏交刑部牢固監禁烏爾圖納遜乃尙書都統阿蘭保乃副都統俱係御前乾清門行走大員令伊

等往喚喀申和卓乃任其抗拒不到殊屬無能設令伊等赴軍營
拏賊豈有如此空回之理看來伊二人前在軍營亦不過如此塞
責未必實力奮勉烏爾圖納遜著革去尙書都統降補正黃旗蒙
古副都統同齊哩克齊出牧阿蘭保著革去副都統作爲頭等侍
衛仍在御前行走以觀後效○諭軍機大臣等勒保見擬由關嶺
進攻疏通大道以便珠隆阿張玉龍等會合以次勦辦所辦尙是
苗匪等膽敢圍擾南籠郡城及永豐等處而冊亨城猝被陷州同
曹艾全家被害且定番等處逼近省城該處亦有賊滋擾勒保見
抵安順湖南續撤大兵諒已陸續到彼狃苗究係烏合無難一鼓
撲滅此事專交勒保督辦至滇黔交界西南普安州至黃草壩一
帶見有苗匪屯聚經勒保飛調總兵扎郎阿前來督率防堵務宜
嚴密防範勿使狃苗一名闖入滇境見在黃草壩被圍亟須援解

並著傳諭江蘭或再酌派弁兵前赴黃草壩與慶玉內外夾攻以期肅清一路其東面都勻古州一帶與粵西接壤冊亨既經被陷而捧酢羅斛歸化等處俱有苗匪亦當亟籌勦洗吉慶當與彭承堯帶領官兵前赴黔境將冊亨收復將此各傳諭知之○以惠齡為理藩院尙書由戶部侍郎遷○壬戌諭近因喀申和卓捏病不肯當差是以革去公爵交刑部監禁伊之公爵並非軍功所得覈其罪原應削奪但念伊父伊叔自投誠以來奮勉行走著加恩將伊鎮國公爵作為輔國公令伊從弟巴巴克和卓承襲以示朕矜恤回奴至意尋命將喀申和卓釋放交該旗管束不許滋事○諭軍機大臣等賊匪焚掠保安驛站後折由裕州沿山西竄景安趕至四里居地方與王文雄奮勇勦殺而巴克坦布慶成等亦由應山一帶追蹤跟勦與景安會合見在賊匪既向南趨豫省地方不至遁其

蹂躪但此一股賊數如此之多前據景安奏到朕卽以其中必有
爲首之人今據巴克坦布等奏賊首李全王廷詔姚之富均在其
內必須設法將此三犯生擒毋任漏網著傳諭知之○癸亥 上
親耕藉田○董誥丁母憂命劉墉爲體仁閣大學士調沈初爲吏
部尙書以朱珪爲兵部尙書調張誠基爲安徽巡撫以吉慶兼署
廣東巡撫

夏四月壬申增設湖南乾州協永綏協保靖協鎮守鎮綏靖鎮古
丈坪辰州後營烏宿洗溪浦市三營遊擊都司守備千總把總外
委等官予鎮守永綏屬苗守備等餉銀改保靖縣爲流官仍設苗
弁一○丙子姚燾以疾免以田鳳儀爲福建巡撫汪志伊爲福建
布政使陞伯焜爲江西按察使由光祿寺少卿遷○以陳大文爲廣東巡
撫莊肇奎爲廣東布政使陳用敷爲廣東按察使前任安○辛巳

上奉 太上皇帝敕諭追贈故兵部侍郎奉寬太師禮部尙書

○甲申諭軍機大臣等上年邪教起自長陽當陽未幾即襄一帶相繼滋擾雖經以次撲滅而巴東歸州之賊竄入黃柏山近又逃匿芭葉山其達州教匪延及興安紫陽等處者亦已肅清而金義寺清溪場賊巢迄今尙未剿滅至襄陽之賊先在鍾宜聚隨一帶屯聚近又由盧氏竄入陝境商雒一帶東奔西竄往來無定所過村莊焚掠爲害若不亟籌掃蕩僅事尾追使未經蹂躪之區復遭擾累日復一日伊於何底各路領兵大臣俱係朕特派前往甯不知賊匪多過一處卽多擾一處多一日搶掠則百姓多一日顛連而糜費帑金尙爲餘事伊等身列行間目擊情形何以漫無籌畫若云軍營事權不能歸一則襄陽一路原責成惠齡達州一路責成宜絲黃柏山一路責成額勒登保福甯若云兵力不敷已節次

派調鄰省各兵京營勁旅並湖南撤回勝兵共至數萬軍威不爲不壯卽軍餉一項各省撥解以及特發部帑不下三千餘萬豈尙不敷支給卽此外尙有礙難情形伊等亦應據實奏聞或自揣才力不能辦賊更當奏明候朕另派大臣前往督勦乃諸處大員並無一字奏及况明季流寇橫行皆緣其時紀綱不整朋黨爲奸文恬武嬉置民瘼於不問以致壞事方今吏治肅清勤求民隱每遇水旱偏災不惜多費帑金蠲賑兼施百姓具有天良均應知感此次邪匪煽誘不過烏合亂民國家威棱遠播凡在荒徼無不賓服若以內地亂民糾眾滋擾不能立時殄滅其何以奠九寓而服四夷耶伊等若再不知激發天良速擒首逆埽除餘匪以致流毒蔓延多耽時日自思應得何罪再湖北賊匪前在荆宜施襄鄖一帶其焚掠處所在各府縣中統計若干處合之湖北一省約有十分

之幾又襄陽之賊竄入豫境由桐柏至嵩縣盧氏內鄉浙川一帶
被搶村莊若干見復竄至陝西商雒及達州教匪闖入興安紫陽
一帶被賊蹂躪處所若干及達州之賊在該州境內焚掠村莊若
干川陝二省各有十分之幾並著查明覆奏至被擾各該省州縣
難民復業者已有若干見在如何安輯並著各督撫妥爲撫綏勿
使失所去而從賊方爲妥善朕於有功自加懋賞有罪亦予嚴懲
信賞必罰惟在各路領兵大臣自擇耳勿謂言之不豫也慎之勉
之○免湖北教匪滋擾之應山等五縣額賦○丁亥勒保奏嚴勒
南籠下山塘等處苗匪得旨獎賚賞兵丁一月錢糧○召成林來
京調台布署廣西巡撫張誠基爲江西巡撫以朱珪暫攝安徽巡
撫山兵部
尚書署○以羅國俊爲內閣學士由詹
事遷○戊子勒保奏獲雲南
威遠獐首扎杜○辛卯予四川達縣等三州縣被賊難民三月口

糧及修屋銀○宜縣等奏攻克清溪場金莪寺等處賊寨得旨獎
資賞兵丁一月錢糧○壬辰追封側福晉完顏氏爲 恕妃格格
關佳氏爲 簡嬪沈佳氏爲 遜嬪○以京師缺雨命刑部清理
庶獄○甲午諭詹事府各員京察嚮旣歸翰林院掌院辦理而該
衙門事務又仍係該堂官自行未歸畫一原辦未免疏漏所有詹
事府衙門事務嗣後均著翰林院掌院管理○賜予告大學士蔡
新子舉人本俊內閣中書○丁酉命疏濬安徽宿州靈璧縣灘股
河鳳臺縣裔溝河江蘇豐沛二縣順隄河食城河○己亥宜縣奏
攻克四川王家寨賊寨

五月庚子朔 上奉 太上皇帝命賜安南國王阮光纘敕諭曰
近因洋面地方時有匪徒劫掠之事曾經閩粵總督照會該國王
一體協擊今據兩廣總督臣奏稱該國王差委官弁丁公雪等帶

領兵船前赴夷洋巡查勦捕拏獲盜匪黃柱陳樂等六十餘名將所獲人犯船械解送內地辦理並於賊匪屯聚處所派委妥幹員弁留兵設守 太上皇帝甚嘉該國王小心敬事恭順矢誠用是特沛渥恩加以優賚茲頒去如意玉山蟒錦紗器等件委員齎往宣賜以昭優獎該國王仰承寵眷益當飭令所屬員弁悉力巡防隨時搜捕如有盜匪仍前在洋滋擾卽行擒拏解交內地究辦若能拏獲盜首更爲奮勉可嘉務使奸匪肅清根株淨盡以安商旅而靖海洋該國王尙其恪恭效順彌深感勵以期倍沐恩施欽此特諭○辛丑加封螭磯靈澤夫人爲崇節惠利夫人○甲辰 上奉 太上皇帝命詣 黑龍潭祈雨○乙巳修明太祖陵○撥部庫銀二百萬兩備四川軍需○丙午 上奉 太上皇帝命詣天神壇祈雨○是日大雨○庚戌復設湖南鳳凰乾州永綏三廳

兵○癸丑 上至靜安莊 大行皇后殯宮行百日祭禮○甲寅
撥部庫銀二百萬兩備陝西軍需○乙卯緩徵河南教匪滋擾之
鄧州等二十一州縣及原辦兵差之南陽等二十三州縣並堵禦
出力之伊陽等九州縣新舊額賦○己未行冊諡 孝淑皇后禮
○上奉 太上皇帝敕諭 貴妃鈕祜祿氏繼位中宮先冊封
皇貴妃○壬戌以貴州狝苗滋擾予南籠府並普安等五州縣
郎岱等五廳州縣羅斛廣順各邊界貧民口糧免南籠府屬州縣
普定等七廳州縣元年逋賦二年額賦緩徵襄辦軍務之貴陽等
七府逋賦○乙丑諭前因陸有仁將撤拉爾回兵暫停循化以致
遲誤軍行當經降旨將陸有仁交部嚴加議處漢中一帶兵力稍
單是以檄調此項回兵乃教匪竄至漢陰而回兵尙在循化且經
宜縣連札屢催此時尙無入陝之信是陸有仁從前遇事張皇假

稱自願帶兵前赴陝境一經降旨申飭正稱其不欲向前之心於檄調應援之兵亦經屢催罔應遲誤軍情較永保之漫無調度者尤爲過之不必更俟部議陸有仁卽著革職拏交刑部治罪至四川軍需事務本有該省司道董率辦理且宜縣見在川境帶兵所有總督事務卽著宜縣就近兼辦英善卽馳驛前赴甘肅新任藩司楊揆見在川省未卽赴甘英善著仍以刑部侍郎兼攝藩篆並代理總督事務○戊辰 上侍 太上皇帝啓鑾秋獮木蘭○免經過地方額賦十分之三○己巳諭軍機大臣等本日惠齡等報到賊匪於五月十二日由白馬石搶船渡江並據獲犯供稱李全王廷詔姚之富三股已歸併一處惠齡等竟已放賊全數渡江尙敢覲顏陳奏無恥之至賊匪渡江五日伊等始經趕到勦賊機宜卽片刻亦不可緩何況至五日之久豈非與賊以暇况兵法有半

渡而擊者賊匪於十二日偷渡時若急躡賊蹤遊之半渡可以聚而殲戮乃坐失機會實屬大錯又查閱惠齡前進原圖前兩股之賊向西奔竄係惠齡慶成追剿第三股之賊向東奔竄係恆瑞追剿嗣恆瑞奏郎西鄉勇攔截復折而西向三股之賊俱併爲一恆瑞既不能趕上賊匪又不能與落後之惠齡慶成會合一處是賊能歸併而統兵大臣轉不能會合尤屬可惡可笑至柯藩等在洵陽一帶正當遏賊西竄之路既不能在沿江截殺又不能趕赴惠齡等一路殊不可解此次種種玩誤若按軍法從事尙不止於擊問惟因一時帶兵乏人姑予立功自贖之路惠齡前賞宮銜世職雙眼花翎恆瑞柯藩艾如文花翎俱著革去暫留本任頂帶慶成前已革去宮銜花翎巴圖魯名號著再降爲二品頂帶暫留提督之任舒亮著降爲三品頂帶暫留副都統之任伊等經朕此次格

外寬宥自應加倍感愧勉贖前愆若再仍前遲誤必將伊等於軍前正法示眾決不寬貸就目下情形而論宜縣一路調度俱合機宜今賊匪竄至川境而惠齡屢經貽誤豈可復膺總統之任著一併革去與恆瑞慶成各爲領隊聽候宜縣調遣一切軍務著宜縣總統明亮德楞泰幫辦以期事權歸一○撥內庫銀二百萬兩備湖北軍需

六月壬申諭軍機大臣等前因惠齡等行走遲延縱賊偷渡漢江降旨嚴飭頃又將伊等原摺細閱內稱俟將船隻略爲修整卽行渡江追剿賊匪賊匪於十二日偷渡惠齡等十九日趕到已遲緩七八日迨至江邊卽應蹣跚追剿何以又不剋期濟渡豈賊匪肯因官兵修船在中途停候乎賊匪渡江後是否徑行竄至達州抑或尙在沿途焚掠此時官兵自己早經渡江曾否趕上賊匪何以

未經續奏抑豈尙在修船耶柯藩文如文本在洵陽一帶邊賊西竄之路乃不在江北堵剿轉渡江而南至興安郡城尙可藉賊多兵少爲詞追賊旣渡而莊浪等處撥調之兵計已早到柯藩並不
在沿江防守迎殺賊匪豈惟知株守郡城藉此爲避賊安坐計耶
秦承恩駐紮鎮安槐樹坪賊匪渡江地方官斷無不稟報之理何
以未據奏聞况漢江船隻前據秦承恩奏已飭令移泊南岸而惠
齡等亦札知轉飭移泊飭令移泊船隻之人究係何員此等玩誤
地方官若不予以嚴參何以示儆至宜縣業已派爲總統一切軍
務全賴調度伊係本省總督賊匪偷渡後地方官自必隨時稟報
宜縣亦必早派大員迎剿所派係屬何人賊匪曾否已入川境何
以總未奏及將此諭令知之○癸酉諭軍機大臣等勒保奏剿克
水煙坪隘卡擒獲賊目看此情形賊人門戶已破而勒保所謂之

雲南兵練及湖南撤回雲貴官兵此時諒經早到勒保自卽乘勢督兵前進或此時吉慶等已將廣西邊境廓清帶兵赴黔與勒保等兩面夾擊更可迅速集事再勒保奏訊據獲犯供稱仙達仙姑內有光仙囊仙二人爲首號召眾苗在大王公之上並有偽總兵將軍等號苗匪等膽敢捏造僞官不法已極必須按名拏獲解京盡法處治又據奏雲南邊界各路勦辦情形內稱有悔罪來投之猺夷等繳出鳥槍又猺夷陸紹先密來報信爲官兵引路將富村屯踞苗匪勦斃多名可見該處猺夷不爲苗匪誘惑尤當妥爲駕馭○甲戌 上侍 太上皇帝駐避暑山莊○丁丑免湖南逆苗滋擾之乾州等四廳州縣苗糧○癸未諭軍機大臣等吉慶與彭永堯分兩路前進將隆或賊寨攻克西隆邊界苗寨惟亞稿隆或二處聚集苗匪較多今隆或旣經攻克止有亞稿一處見在吉慶

等乘勝進攻諒可卽日掃蕩肅清後路帶兵渡江進赴南籠興黔
省會合夾擊勒保吉慶等務將爲首之仙達仙姑及漢奸人等接
名擒獲其餘夥黨得勦則勦得撫則撫早一日成功則地方早一
日甯帖○癸巳諭軍機大臣等額勒登保統領官兵連克大坑口
木城石卡殺賊四百餘名據奏攀陟險阻衝冒矢石各情形幾於
不忍披閱又據惠齡等奏恆瑞追勦東甯之賊折而向西因探得
柯藩駐兵趙家灣一帶諒賊匪不能越過不意賊匪直向西邊等
語賊匪偷渡漢江竟係柯藩不能堵勦所致惠齡身爲總統恆瑞
亦係領兵大臣旣知柯藩貽誤何以並不嚴參將此諭令知之○
乙未諭軍機大臣等勒保奏勦克卡子河緊隘惟餘普坪一處想
勒保乘勝進勦無難剋期攻克速解南籠之圍況閩摺內稱南籠
東鄉阿伍箐等二十三寨西鄉那利等六十一寨南鄉木咱等四

寨俱繞道來投卽新城後路法泥等寨亦遠道赴營投順可見賊勢窮蹙已極勒保自應妥爲安撫俾匪眾聞知相率投順庶賊黨益孤於勦辦尤爲有益○以勦克卡子河苗匪要隘賞勒保雙眼花翎

閏六月己亥朔諭軍機大臣等觀成奏官兵攻克九龍池賊巢所辦雖好而賊首陳崇德又逃往老木園地方不值卽加賞賚見在官兵已將緊要隘口圍堵觀成務當上緊勦辦毋任再有竄逸並加意嚴防勿使與楚匪勾結合夥○庚子諭軍機大臣等此次吉慶等因亞稿正路急切不能得手由小路繞至亞稿之後乘夜蹕山而進直抵亞稿焚燒寨屋將賊巢蕩平實爲出力可嘉至首逆龍登連務須上緊接拏以期必獲○以攻克西隆州亞稿苗寨功加吉慶太子太保彭承堯太子少保均賞雙眼花翎○壬寅諭軍

機大臣等宜絲等於十六日搶占小義城山十七日五更賊又乘霧雨瀰漫之際潛行逃竄實屬可惡看此情形必是兵圍不固又令賊匪竄逸宜絲明亮德楞泰均著傳旨申飭又據額勒登保等奏賊匪於二十日夜間由諸神保一路營卡逃竄諸神保卽著革職拔去花翎仍留軍營效力贖罪副將朱士奉遊擊何天標俱著革職擊問至額勒登保福甯之咎止於調度未周賊匪並非由伊犁營地方逸出此時且不必交部額勒登保向來打仗奮勉見在此路賊匪仍責成額勒登保與福甯督率勦辦再摺內稱賊匪見在竄匿之處距芭葉山有五十餘里已派令關騰慶溥前往抄截此時賊匪曾否截住儻前路無兵攔截以致未經被賊地方復遭蹂躪所關緊要建始與川省之大甯相近昨據觀成奏九龍池之賊又竄往老木園復經官兵圍住本日劉君輔奏移兵竹山竹谿

堵剿前已有旨令劉君輔及馬瑀徐昭德帶兵徑赴大甯堵剿想該提鎮等接奉前旨自己前赴大甯僦老木園賊匪剿辦略需時日著觀成酌量於劉君輔馬瑀徐昭德內留一人在老木園幫同剿賊分二人帶兵前往建始巴東一帶探聽迎堵並著宜縣等一體留心偵探僦芭葉山賊匪亦竄至川省夔州界內務於帶兵大員內酌分一人前往幫同額勒登保等夾剿以防賊匪會合勾結爲要○丙午諭勒保奏官兵至南籠城內難民男婦數萬均來迎接當將裹帶糧食及連日所獲賊糧按名散給並卽派員賑撫等語南籠府城受困半載賊匪日來滋擾民食已罄城內紳士民人等深明大義晝夜備禦捐助新米得以同心協力固守無虞今勒保解圍到郡見城內難民口食不敷情形已極疲憊實堪憫惻所有南籠應徵錢糧著該督查明蠲免一年其餘被賊滋擾地方如

永豐冊亨捧鮮黃草壩及粵滇邊界被擾各處亦均著該督撫查明各免一年錢糧俾閭閻元氣漸復民力寬裕用副軫懷其守城

兵勇均著加恩賞給一月錢糧口糧以示獎勵

勒保傳攻克普坪大王公中槍斃師

由壩弄五孔橋抵南籠城解其圍

○以南籠解圍勒保得旨嘉獎下部議敘○戊

申諭貴州南籠係由廳改郡本年狎苗滋事以來該郡紳士民人

等深明大義眾志成城被圍日久固守無虞允宜特錫嘉名用昭

勸勵南籠府著改爲興義府所有該府印信著該部照例改鑄發

給俾其顧名思義共勉敦龐以副朕褒獎善良至意○庚戌撥內

庫銀四百萬兩備四川軍需○壬戌諭大學士王杰因骸疾不能

入直著不必在軍機處行走卽回京供職漢軍機大臣止有沈初

一人外廷漢大臣內年老者多卽有尙能辦事之人於機務究未

諳悉吳熊光戴衢亨在軍機章京上行走有年自爲熟習念其職

諳悉吳熊光戴衢亨在軍機章京上行走有年自爲熟習念其職

分較小者加恩各賞三品卿銜照松筠台布之例隨同軍機大臣學習行走兵部右侍郎傅森亦著一體學習行走庶可漸資造就○諭軍機大臣等勒保奏擒獲首犯痛剿賊匪所辦可嘉見在馬鞭田苗寨已經攻克賊匪勢益窮蹙止餘永豐冊亨捧鮮黃草壩四處苗寨務當奮勇進剿以期迅速解圍至苗逆李阿六旣已拏獲監禁務須嚴密看守勿令畏罪自戕俟囊仙等拏獲一併解京處治○癸亥吉慶奏亞稿首犯龍登連經族姪龍起鳳諭以官軍聲勢率其子龍朝鳳投誠諭軍機大臣等龍登連父子聽從黔苗句結滋擾如果被官兵擒獲卽予以寸磔亦所應得今旣畏法投出尙有一綫可原龍登連父子見已送京其家屬人等亦應送京著吉慶傳知龍起鳳轉諭龍登連寨內之人龍登連龍朝鳳送京後斷不加以誅戮其家屬人等亦不治以緣坐之罪並當給以養

膽俾骨肉團聚如此明白曉諭各苗寨亦必聞風效順於安撫苗境機宜更爲有益見在首犯雖已投誠其附近餘匪不可不搜除淨盡以絕根株○丁卯勒保奏殲戮洛美學莊等處苗匪解黃草壩城圍滇黔路通○展賑貴州狎苗滋擾之興義府各屬民苗

東華續錄

嘉慶四

臣王先謙敬編

臣周嗣蕃恭校

秋七月戊辰朔先是代辦四川總督英善疏題灌縣民李世楷女二姐爲周俸瀼姦拐同逃經李世楷拏獲毆斃將周俸瀼擬絞李世楷擬杖下三法司議至是議覆得旨此案周俸瀼姦拐李二姐同逃被李二姐之父李世楷拏獲登時將李二姐毆斃該督原題及刑部議覆本內均引本夫姦所殺死姦婦例辦理但父之與夫名分不同若因例無專條亦當將比照之處詳晰聲敘何得竟以本夫殺姦之例定擬殊未明晰著刑部即將此本援引比照之處聲明更正至父母毆斃無罪子女予以杖罪尙爲慎重人命起見今李二姐既經犯姦卽係有罪之人李世楷將伊女毆斃係出於

義憤尙有何罪雖所擬杖罪聲明遇赦援免但究不應以杖罪科
斷嗣後遇有似此情節者其父母竟不必科以罪名並著刑部將
此例刪除以昭明允○己巳直隸永定河溢○庚午田鳳儀丁憂
調費渚爲福建巡撫以康基田爲江蘇巡撫兼管南河事調司馬
駒爲山東布政使兼管東河事賀長庚爲山西布政使以常明爲
貴州布政使調張繼辛爲貴州按察使先福爲四川按察使陳用
敷爲陝西按察使以常齡爲廣東按察使由鹽運使遷○太子少保湖
廣總督畢沅卒晉贈太子太保○癸酉以雨詔停秋獮○丙子諭
軍機大臣等魁倫奏盜首林發枝勢已窮蹙欲率領盜夥投首等
語林發枝非尋常盜匪可比如果真心投順固當貸其前罪但不
可仍留閩省恐有勾結情事將來投首後當照張表之例來京安
置其未行投首之前仍當嚴密緝捕不可稍存懈弛○諭勒保自

派兵攻剿黃草壩後自當趁此兵威次第剿辦捧鮓一處與黃草壩毗連固應就近進剿而永豐爲知州駐紮之地民戶稠密尤應速解圍城以蘇民困卽冊亨一處亦應將賊匪及早撲滅俾黔省道路疏通以期迅速蕆事又據吉慶奏攻剿者煙等處粵省邊境零星餘匪一經投盡卽當遵照諭旨酌帶勝兵迅速渡江與黔省官兵會合夾擊再附近亞稿各村莊避難民人漸次歸莊自當加以撫恤但恐每戶六錢之數尙不足用卽酌量加增亦無不可總在察看情形毋使貧民稍有失所○己卯命喀什噶爾英吉沙爾二城儲糧一萬石備荒○辛巳諭軍機大臣等賊匪齊王氏姚之富等欲往歸州巴東與長陽賊匪合夥明亮等見繞出賊前相機迎擊著汪新酌帶兵勇迅往緊要處所幫同堵拏其界連歸州之竹山竹谿等處亦當嚴密防堵毋使勾結煽惑所有帽子山城口

子屯聚賊匪著額勒登保等專心勦辦斷不可使與歸州巴東賊
匪合夥至開縣萬縣雲陽新起之賊業經宜縣等派令分股兜捕
自不至與前起之賊合夥即使歸併一處更可聚而殲洗再竹山
竹谿興山房縣保康等處恐有伏而未動餘匪此等匪徒若果附
和響應自當速爲勦辦如尙伏而未動卽紛紛接捕必致堅其從
賊之心且各處人數眾多曷予誅夷朕心亦有不忍惟在明亮等
酌量機宜隨時勦辦以期速靖地方○以姜晟兼署湖廣總督○
乙酉免四川運送軍精之奉節等六縣明年額賦○丁亥予貴州
降苗一萬七千八百八十餘戶安撫銀米○庚寅賞授首洋盜林
發枝七品銜來京安置○甲午撥內庫銀一百萬兩備湖南軍需
○丙申免雲南猺苗滋擾之羅平等三州縣及邱北縣丞五槽州
判所屬額賦

八月丁酉朔江南碭山境內楊家壩河溢命蘇凌阿等馳往堵築
○己亥山東曹汎壩河溢○庚子撥內庫銀三百萬兩備湖北軍
需○免陝西教匪滋擾之商州等八廳州縣額賦緩徵石泉等九
州縣額賦並咸甯等二十二縣逋賦○甲辰永定河漫口合龍○
乙巳調陸伯焜爲浙江按察使託倫爲江西按察使○丙午緩徵
黔苗滋擾之雲南羅平等三州縣逋賦○丁未諭前因陸有仁停
調撒拉爾回兵一事辦理錯謬幾致貽誤是以將該員革職解京
審訊並令宜縣秦承恩據實查奏續據宜縣等先後奏到陸有仁
因拘泥候旨於四月二十五日檄令回兵暫停候信旋於五月初
一日接到秦承恩知會卽飭令回兵剋日起程由小路兼程前進
等語今據委員將陸有仁解到經軍機大臣嚴訊所供情節與宜
縣等所奏尙屬符合而檢查柯藩奏報之摺此項回兵由白馬關

兼程前進俱全數趕赴西鄉經柯藩帶兵勦賊亦有案據是此次
所謂回兵雖經陸有仁停調於前一得秦承恩知會即催令兼程
前進僅遲五日且俱已趕赴西鄉經柯藩帶領勦賊不至終於遲
誤其罪尙屬可原陸有仁著加恩免其治罪卽發往四川軍營交
與宜縣令在軍需局效力贖罪○賑四川教匪滋擾之通江等六
縣貧民○癸丑賑黔苗滋擾之廣西西隆州六甲村莊貧民○甲
寅截留湖南漕糧二十萬石備湖北軍糈○丙辰范宜恆卒調沈
初爲戶部尙書朱珪爲吏部尙書仍暫署安徽巡撫金士松爲兵
部尙書紀昀爲禮部尙書以胡高望爲左都御史調吳省欽爲吏
部左侍郎以范建中爲工部右侍郎由副都○調成德爲吏部右
侍郎泰甯爲工部左侍郎由盛京工部侍郎調○以熊枚爲刑部右侍郎陳
用敷爲安徽布政使陸有仁爲陝西按察使○丁巳勒保等奏攻

克安有山梁得旨賞資○己未諭大學士公阿桂老成練達辦事多年自平定西陲時卽隨同出師旋經理新疆事務周詳妥善懋著勤勞嗣勦辦兩金川畀以將軍重寄秉承方略堅持定見克肅膚功特封爲一等誠謀英勇公賞給四國龍補服黃帶紫韁紅寶石帽頂雙眼花翎圖形紫光閣以旌殊勳續經簡任綸扉綜理部務贊襄樞要二十餘年前因撒拉爾及石峰堡回匪滋事統兵剿捕立就殄平復加恩賞給輕車都尉世職令伊長孫承襲疊沛恩施正資倚畀邇來雖精力稍衰兩耳重聽猶照常趨直夙夜靖共頃聞患病頗劇特派皇三孫貝勒縣億御前侍衛豐伸濟倫由熱河馳往看視並賞賜陀羅經被仍冀調理或可就痊茲聞溘逝深爲悼惜著卽令縣億並另派散秩大臣一員同侍衛十員前往奠醑加恩晉贈太保入祀賢良祠應得卹典該衙門察例具奏尋予

祭葬諡文成○庚申 上侍 太上皇帝自避暑山莊回鑾○丙寅 上侍 太上皇帝還京師○緩徵廣西省及各土司苗匪滋擾地方額賦

九月戊辰勒保奏攻克洞灘當丈苗巢生擒犛苗首逆王囊仙韋七綰髮殺賊千餘燒斃賊眾萬餘並生擒男婦千六百名口諭軍機大臣等此時首逆既擒其附和苗寨自必望風震懾官兵乘勝直前永豐冊亨之圍自可不攻而解但王抱羊一犯與王囊仙俱係起事首逆必當一併擒獲勒保應趁此兵威曉諭降苗令其投捕縛獻以淨根株其餘被脅悔罪苗民妥爲蠲馭安撫俾安生業○晉封勒保三等侯○增設福建蓮河鹽場大使○壬申諭軍營嚴覈軍功毋濫保多人○以薩敏爲盛京工部侍郎○癸酉諭本日閱四川省情實人犯招冊內廖氏與滕義懷通姦因庶

長子周應鶴防範嚴密該氏商同姦夫將周應鶴殺斃一起將廖氏依嫡母因姦故殺庶子其夫不至絕嗣擬以絞候永遠監禁又殷氏因與周三耀通姦將伊子勒斃一起將殷氏依親母因姦故殺子女例擬絞因伊夫業經絕嗣入於秋審情實固屬按例辦理但細覈前起案情廖氏與滕義懷通姦被周應鶴撞破以顏面攸關遂爾隱忍該氏戀姦情密因伊子防範嚴密不能續舊遂起意商令姦夫滕義懷在牆外撒土該氏詭稱有賊喊令周應鶴往視滕義懷卽用刀將周應鶴立時戳斃是其子尙有愛父之心而此婦淫邪乃忘其夫殘忍不仁實出情理之外婦道以節義爲重若身犯姦淫罔顧廉恥甚至因伊子礙眼殺以滅口是於夫婦之倫旣乖卽於母子之恩已絕無論準以母出廟絕之義卽不得復拘泥其夫有無子嗣成例分別辦理况嫡母之於其子本非所生與

親母究覺有閒若於此不大爲之防則淫邪之婦恃有名分戀姦逞殺實不足以維風化而飭綱常嗣後婦人因他故起釁故殺其子者自當仍照舊例辦理外其因姦殺子者無論嫡母親母繼母嗣母俱照例分別斬絞不論其夫有無子嗣皆入於秋審情實辦理其永遠監禁之條卽著刪除此案廖氏已飭照此旨改擬以示防維名節懲創邪淫至意著爲令○陝西巡撫秦承恩奏請蓋棚棲截留難民給銀卹被害良民從之○甲戌諭軍機大臣等汪新奏施南地方又有賊匪滋擾雖經派副將樊繼祖帶兵前往但兵力無多額勒登保等於辦竣帽子山竄匪後自應就近移師往剿將此諭令知之○丙子 上至靜安莊 孝淑皇后殯宮奠酒○丁丑 上臨故大學士公阿桂第賜奠○諭御前侍衛公惠倫前經派往軍營打仗殺賊頗爲奮勇茲在長坪地方勦捕因射賊墮

馬正欲趕擒忽中賊槍陣亡惠倫係奎林之子繼與明瑞爲嗣明瑞從前亦係陣亡父子效命疆場實爲可憫著交部從優議卹仍由廣儲司賞銀三千兩給伊家屬辦理喪事其應襲公爵卽著伊子博啓圖承襲俟百日服闋後著在御前侍衛上行走以示朕軫卹蓋臣至意○戊寅勒保奏進攻巴林苗寨擒首逆王抱羊吉慶奏剿除賊苗收復冊亨均得旨獎賚○辛巳勒保等奏洞瀝當丈兩處逆苗剿除淨盡晉一等威勤侯○改貴州永豐州爲貞豐州嘉其前被苗匪攻圍官民固守功也○壬午諭軍機大臣等見在明亮德楞泰等屢殲賊眾軍威已振又調往之吉林官兵俱已到彼明亮等正可馳驟殺賊惟是賊匪見官兵聲勢浩大自必紛竄狂奔該督等務須探聽賊蹤設法布置豫行堵截使賊匪無從乘閒奔竄明亮等得以盡力剿殺再於新到官兵內派令得力將弁

分帶勁兵繞出賊前首尾合擊自更可事半功倍也道員保定節次堵禦出力加恩賞戴花翎再川楚陝西等省被賊蹂躪地方屢經降旨令該督撫加意撫恤此時賊匪奔竄焚掠難民必多失業若不妥爲安撫轉恐去而從賊並著該督撫等督飭所屬實力撫恤毋任流離失所○甲申命蘇凌阿爲東閣大學士調李奉翰爲兩江總督兼管南河事以康基田爲河東河道總督調費淳爲江蘇巡撫以汪志伊爲福建巡撫高杞爲福建布政使調張長庚爲湖北按察使以荆道乾爲山東按察使由登萊青道遷○乙酉定大逆緣坐人犯發黑龍江給索倫達呼爾爲奴例○丁亥調勒保爲湖廣總督以鄂輝爲雲貴總督由湖廣提督遷○己丑命景安愛星阿馳勦湖北施南教匪○庚寅命宜縣等分募四川湖北陝西甘肅河南鄉勇入伍訓練○癸巳諭軍機大臣等聞近日賊匪每至一村莊先

將年壯平民偏令入夥一遇官兵輒令入夥之人當先抗拒賊匪
隨後接應若當先者被兵剿敗賊匪卽乘閒先竄官兵則隨後殺
掠報功節次摺內所稱殺賊無數者大抵皆偏脅平民而真正教
匪早已遠颺所以日久不能成功而新起入夥之賊未必不由官
兵驅迫所致於事大有關係著傳諭帶兵各大員或於剿賊之前
徧行示諭臨陣時再傳朕旨諭以爾等被賊偏脅本係無罪平民
與其爲賊先驅致遭殲戮何不拋棄兵械投順官軍卽得生路或
再能反戈勦賊並可仰邀恩賞庶被賊偏脅者自不肯仍前爲賊
前驅臨陣時亦必多有解散方可痛殲賊眾仍當嚴束士卒秋毫
無犯方無忝將帥之任儻經此次開導後仍有前項情弊不但無
功並當重治其罪懷之慎之○撥部庫銀二百萬兩備陝西軍需

○甲午以湖北恩施利川二縣及四川奉節縣士民奮剿教匪再

免一年錢糧○乙未諭軍機大臣等姚之富齊王氏尤爲賊首中
緊要之犯明亮德楞泰總當確探二首逆蹤跡專心設法擒獲此
外四川賊首徐添德王三槐羅其清冉文儒責成宜縣巴東賊首
林之華覃加耀責成額勒登保等老木圍賊首責成觀成劉君輔
安康賊首李金責成惠齡恆瑞慶成彼此各辦各賊不拘何路擒
獲賊首卽屬該處帶兵大員之功何路任賊首縱逸卽係該處帶
兵大員之罪將此各諭令知之○丙申諭畢沅前在湖廣總督任
內辦理苗疆及教匪事務失察之處甚多功過尙待定論竟不必
與諡

冬十月丙午調傅森爲戶部侍郎以成林爲兵部侍郎

原任廣西巡撫○

壬子 上奉 太上皇帝命冊封 貴妃鈕祜祿氏爲 皇貴妃

○乙卯改貴州安龍鎮爲安義鎮○丙辰 乾清宮 交泰殿災

○己未惠齡奏堵剿漢江一帶賊匪得旨獎賚賞還雙眼花翎賞兵丁一月錢糧○辛酉命勒保總統四川軍務

十一月戊辰定貴州松桃廳直隸同知隸貴東道並定新設松桃廳新改銅仁縣縣丞銅仁府磐石巡檢鎮遠府四十八溪主簿爲苗江調缺○丙子貴州苗匪首逆王囊仙韋七綵鬚等伏誅○丁丑緩徵貴州苗匪滋擾之平遠等三州縣額糧及逋賦○庚辰賜霍罕伯克那爾巴圖敕諭曰據喀什噶爾參贊大臣等奏爾一聞薩木薩克等有欲來滋擾喀什噶爾之信卽帶兵前往堵擒又遣爾子邁瑪迪敏往拏薩木薩克之子玉素普等語從前爾祖額爾德尼在時諸事恭順曾受恩眷爾承襲後能繼爾祖恭順之忱朕深嘉悅今又能帶兵協剿薩木薩克尤爲可嘉朕意欲賞爾職銜以示鼓勵但聞爾已爲阿渾爾等回教凡阿渾卽不應補放伯克

今特賞爾珊瑚數珠一串錦二匹蟒段一匹閃段二匹爾其祇領

更當感戴朕恩愈加奮勉嗣後再有出力之處朕必倍施恩賞勉

之毋怠特諭○癸未蔣兆奎以老疾乞休允之以倭什布爲山西

巡撫陸有仁爲陝西布政使馬慧裕爲陝西按察使由河南開歸陳許道遷

○戊子以保甯協辦大學士由伊犁將軍遷○乙未調趙佑爲吏部侍郎

由工部調

十二月壬寅賜高年頂帶八千四百七十九人○癸卯雲貴總督

鄂輝奏攻勦捧鮮至黃草壩一路苗匪全行肅清○戊申蘭第錫

卒調康基田爲江南河道總督以司馬駒爲河東河道總督由山東布政使

○己酉以陳文緯爲山東布政使調馬慧裕爲河南按察使

以台斐音爲陝西按察使由直隸熱河道遷○甲寅調成林爲工部左侍

郎由兵部調○丁巳曹汎壩工合龍○戊午以顏檢爲江西按察使由雲

南池南道遷

○壬戌以吳熊光爲直隸布政使

由通政使司參議遷

○癸亥勒保

奏訪察各路軍情審度賊勢所以不能得手者蓋緣賊匪隨處焚掠卽隨處句脅是以日久愈多而川陝楚三省犬牙相錯縣亘數千里崇山峻嶺處處有險可恃有路可逃及官兵擇隘堵禦賊又向無兵處滋擾以致有賊之地無兵有兵之地無賊並有賊過而兵猶未來有兵到而賊已先去者東剿西竄南擊北馳以言兜剿卽數十路難以圈圍以言堵禦雖數十萬兵亦不敷分布再四思維見在陝楚兵多賊少川省則兵少賊多若陝楚各路截剿嚴密使賊匪不能北竄歸入川境誘令散者漸聚則官兵層層偏剿轉覺易於爲力通盤籌畫惟有先從川東進剿清一路再進一路以期與各路領兵大員及早會合一鼓埽蕩奏入諭軍機大臣等勒保所稱剿辦情形切中向來各路帶兵諸人之弊勒保既能周知

暢論自當力除積習大加振作况總統責成較重儻帶兵大員從前實有因循怠玩此時仍不聽指示調遣卽當據實嚴參不可稍徇情面庶可迅勉成功所有明亮處欽差關防著卽迅速送交勒保接收蓋用以專責成○是歲朝鮮暹羅琉球入貢○會計天下民穀數各省通共大小男婦二萬七千一百三十三萬三千五百四十四名口各省通共存倉米穀三千一百三十三萬五千九百九十九石二斗八升

東華續錄

嘉慶五

臣王先謙敬編

臣周淪蕃恭校

嘉慶三年戊午春正月庚午以梁肯堂爲刑部尙書胡季堂爲直

隸總督

由刑部尙書遷

○壬申兵部侍郎兼鑾儀衛鑾儀使阿迪斯以請

轎偏側革侍郎職○癸酉諭軍機大臣等昨據泰承恩奏高均德一股折回漢中經官兵在褒城邀擊餘匪向東北奔竄朕方冀明亮等在川境將齊王氏姚之富李全等大股賊匪先行殲獲高均德一股人數無多無難一鼓掃蕩乃本日明亮等遞到之摺轉捨大股賊匪輒帶全隊勁兵追剿高均德僅留烏爾圖納遜帶兵在甯羌防堵實屬大錯況賊匪詭詐或令高均德折竄漢中希圖牽掣官兵盡赴東北而齊王氏等乘閒渡江赴陝滋擾豈不正墮賊

計乎明亮德榜泰茫無主見調度失宜本應革職拏問治以貽誤軍機之罪姑念一時帶兵乏人暫留立功贖罪著將花翎拔去以示薄懲儻仍因循貽誤則罪上加罪看來姚之富齊王氏李全等大股賊匪或已同高均德折竄漢中而明亮等不敢據實具奏若果如此則正應趁此首逆等聚集陝境之時速行圍剿猶可稍贖重愆再高均德北竄過江愛星阿在彼防守不能截住實屬疏玩著革去花翎以觀後效勒保見在墊江大竹一帶剿辦賊匪接奉此旨後著迅赴漢中督辦一切並查明明亮等發摺時如大股賊匪已渡漢江而明亮等畏干重罪不奏則欺罔之罪尤重勒保竟當參奏至豫省相距較遠景安當鎮靜防範勿涉張皇也○甲戌諭明亮德榜泰於川省竄匪高均德一股折回漢中卽置姚之富等大夥賊匪於不顧輒帶全隊官兵至陝追剿所辦乖謬已極業

經降旨拔去花翎所有明亮德楞泰前得世職及優賞紫糧俱著
槩行革去止留本任職銜俾其戴罪圖功以示懲創○諭軍機大
臣等昨因明亮等所辦乖謬降旨訓飭今再四思維明亮等卽欲
留烏爾圖納遜在甯羌防堵伊係帶黑龍江官兵之人亦應將其
原帶兵丁酌量派撥庶可收指臂之效乃輒將綠營官兵給伊帶
領以致兵將不能相識是令其以素不相識之兵禦大夥猖獗之
賊豈非置之死地焉望得力看來明亮德楞泰全不以軍務爲重
惟知自擁強兵爲護衛之計此次勦除教匪以來帶兵大員往往
各自爲計競擇勇健之兵留爲自衛賊退作爲勦敗賊竄惟事尾
隨虛報斬獲坐糜糧餉以致經年累月迄未成功從前永保等卽
蹈此弊今伊二人非擁兵自衛而何若以誅心而論卽照軍法從
事亦所自取姑予曲貸至烏爾圖納遜當明亮德楞泰令帶綠營

兵堵勦大夥賊匪之時竟無一言見在能否堵截不令北竄並是
否先與高均德一同偷渡明亮等前奏有無回護著烏爾圖納遜
據實速奏不可代人受過也○貴州苗匪首逆查得物伏誅苗疆
平○己卯諭軍機大臣等前據明亮奏高均德折竄漢中伊等帶
兵追勦朕卽以必係齊王氏等大夥賊匪北渡漢江明亮等畏罪
不奏今據景安奏高均德渡江後又有一股賊匪接踵過江並有
騎馬女賊數百人此非齊王氏等大夥而何且賊匪竄至五郎而
明亮甫趕至洋縣已落一站之後可見節次所奏俱係飾說全不
足信此時姚之富齊王氏等自已與高均德合夥該處雖有山路
亦多坦途不得復以險峻藉口吉林黑龍江官兵弓馬便捷更可
展其長技明亮德楞泰當趁此速行截勦拏獲首逆儻仍前延玩
伊二人俱有身家性命懍之慎之至泰承恩前奏賊匪向東北奔

竄伊同王文雄迎頭截擊今閱景安所奏賊匪在洋縣屯紮秦承恩在秦嶺相機堵剿是前此並未迎擊僅在秦嶺駐守而明亮德楞泰又落賊後無怪其均未有續奏也秦嶺地處扼要賊匪斷不敢越過但該署撫與王文雄僅事駐守設賊匪東趨商雒轉致無兵攔截或徑由子午谷窺探省城則秦承恩腹背受敵尤屬不成事體著酌量情形應留一人在秦嶺駐紮踰探賊蹤相機截殺其子午谷一處酌分一人帶兵駐守並知會花尙阿陸有仁留心防範至景安分派兵勇防堵情形所辦尙是鄭西一帶係襄陽鎮所屬路超吉已抵新任張文奇應速回豫省幫同堵截將此各傳諭知之○辛巳諭軍機大臣等愛星阿柯藩均係留防漢江之人不能堵截賊匪均有應得之咎但伊二人係分投駐守此次賊匪偷渡處所在長寨以東係愛星阿汛地其罪較重著將護軍統領副

都統全行革去柯藩著拔去花翎暫留提督之任伊二人著在漢江北岸分防儻再有疏失卽當在軍前正法懍之騎馬女賊偷渡漢江又係在何人所管界內著勒保據實詳查嚴行參奏○甲申諭川省軍務正當緊要之時不可無總督大員督率調度勒保見係總統著卽調補四川總督俾呼應較靈得以迅速歲功宜縣本係陝甘總督且陝西亦有應辦軍務著宜縣酌量情形或回駐西安或赴甘肅以資彈壓其川省糧運事宜亦不可無大員督辦並著專交福甯英善悉心經理儻有遲延貽誤惟伊二人是問○乙酉調伯麟爲兵部右侍郎祿康爲盛京戶部侍郎以書敬爲盛京兵部侍郎

由內閣學士遷

○丁亥諭楚北竄匪不過百餘人無難立就蕩

平乃至今尙未辦竣皆由額勒登保福甯攻圍不力展轉遲延致賊匪尙得苟延殘喘卽將伊二人革職拏問亦屬罪所應得姑念

帶兵乏員且予以自新之路額勒登保著降爲三等伯爵並降戴
單眼花翎福甯著革去宮銜花翎以示懲儆仍各留本職令其圖
功自贖以觀後效○己丑諭額勒登保汪新奏擒獲首逆覃加耀
埽蕩楚北餘孽一摺楚北賊匪覃加耀等糾合夥黨在長陽一帶
四出竄擾額勒登保福甯帶兵勦辦任其展轉逃竄已及年餘此
次自巴東折竄歸州額勒登保等又未能奮力進擊遷延數月今
汪新帶兵到後協辦攻圍始將覃加耀等拏獲實屬有過無功前
因額勒登保等種種遷延貽誤降旨將額勒登保降爲三等伯爵
並降戴單眼花翎福甯革去宮銜花翎仍各留本職不過僅示薄
懲今雖同將首逆拏獲而其經年帶兵不力稽延玩誤之咎實所
難辭額勒登保著革去伯爵並領侍衛內大臣都統賞給副都統
職銜令卽赴陝省商雒一帶迎勦賊匪立功自贖至福甯之罪更

重於額勒登保伊本由湖北巡撫升湖廣總督湖南苗匪滋事既有應得之咎而湖北教匪勾結竄擾又係伊所轄地方前在鎮草鎮剿辦苗匪一籌莫展已屬無能及至旗鼓寨剿賊又任賊展轉奔竄毫無振作是福甯之罪實較額勒登保爲重所有四川總督昨已降旨令勒保補授福甯本係總督虛銜今著一併革去亦賞給副都統職銜在川會同英善辦理糧餉各予以自新之路伊二人若不自知愧奮出力自效必當從重治罪至汪新一聞賊匪折竄長陽之信卽移營馳赴終報寨協同剿捕此次額勒登保擒獲賊首或係汪新爲之商酌布置能合機宜否則卽係額勒登保見汪新到後自知愧勵始能擒渠蕝事是汪新於剿辦此股賊匪尙爲出力著交部從優議敘以示獎勵其首先擒獲覃加耀之都司張廷楷著賞換花翎把總孟光爵武舉李普光外委王登科俱

著賞戴藍翎仍各以應升之缺升用鄉勇頭目高元李陞著賞給六品頂帶藍翎以示鼓勵其隨同額勒登保辦理軍營之內閣侍讀學士銜原任郎中胡時顯俟軍務告竣回京補授郎中後遇有內閣侍讀學士缺出再行奏補監生六品職銜黃集祐生員邱裕霖蔣士魁交姜晟汪新以相當之教職佐雜補用其餘摺內所奏帶兵出力及上次所保武職各員均著交勒保察看該員等如果在川陝始終奮勉著有勞績再行奏請加恩示獎未爲遲也○庚寅以吳省蘭爲工部侍郎由內閣學士遷○壬辰諭軍機大臣等勒保甫抵川境初次攻剿卽殺賊一千四五百名生擒賊目三名將新起賊匪全數洗蕩此入川第一功可嘉之至此時勒保統領勝兵迅赴開縣一帶進剿乘此威勢將王三槐等速行擒獲殲盡餘黨廓清全境將此傳諭知之○明亮奏吉林黑龍江官兵擊敗賊匪得

旨嘉獎○癸巳

上奉

太上皇帝命賜琉球國中山王世孫尙

溫敕諭曰朕惟昭德懷遠盛世之良規修職獻琛藩臣之大節輸誠匪懈寵賚宜頒爾琉球國中山王世孫尙溫屬在遐方克抒丹悃遣使齎表納貢忠藎之忱良可嘉尙是用降敕獎諭並賜文綺等物再爾世孫以天朝疊慶重釐倍呈方物固見輸誠效順但國家厚往薄來字小柔遠自有定制惟念爾國僻處海陬梯航遠至已飭所司將此次貢物俱行收受格外加賞嗣後止須照例呈進一分毋庸增添用示體恤其祇承休命世勵忠貞以副恩眷欽哉故敕○甲午諭本年京察屆期吏部開列在京各部院大臣及外省督撫名單進呈請旨甄別一本朕詳加酌覈軍機處大學士和珅參贊機政兼理部務懋著勤勞尙書福長安沈初侍郎傅森在軍機處行走亦屬勤慎克稱厥職朱珪以尙書署理巡撫有年且

學問尙優尙書胡季堂雖甫任總督但在刑部年久於刑名案件辦理諳悉俱著交部議敘總督勒保吉慶魁倫鄂輝巡撫費清汪新姜晟或著續戎行宣勞邊徼或緝捕洋盜勤職封疆俱著交部議敘餘著照舊供職○以戴衢亨爲內閣學士

由詹事遷

二月丁酉撥部庫銀二百萬兩備陝西軍需○甲辰諭勒保奏舒亮穆克登阿勦辦白巖山賊匪疏防貽誤請旨革職治罪一摺舒亮穆克登阿帶兵六千餘名既未能將該處賊匪速行勦辦又未能嚴密圍堵致令逸出與他路賊匪合夥其罪實無可追著將舒亮穆克登阿所有官職全行黜革作爲兵丁留於軍營效力贖罪並將伊二人家產查抄示儆仍著勒保留心察看若伊二人再不知奮勉報效卽於軍前正法示眾如此嚴行懲創俾各路帶兵大員咸知儆惕庶足以肅軍紀而飭戎行○丁未 上詣 文廟釋

莫臨辟雍講學廣國子監本年鄉試中額○己酉諭軍機大臣等
明亮德楞泰勦辦高均德一股賊匪未能速竣致齊王氏等又復
渡江竄合節據明亮等奏前後殺賊已及萬餘如果屬實賊勢早
就窮蹙何至以數倍賊匪之精兵勦窮敗無多之餘匪總未能擒
拏賊首明亮曾任將軍屢次出兵自當倍加勇往乃曠日持久惟
事尾追疊經嚴飭總不知愧懼二人之罪以明亮爲尤重宜縣此
時自應到陝當速赴明亮軍營將所帶官兵悉行統領督率德楞
泰等實力勦辦並傳旨卽將明亮革職拏交刑部治罪○辛亥諭
軍機大臣等前賊首齊王氏等由石泉偷渡在漢中之東自係柯
藩汎地今據柯藩奏到情形並自請從重治罪果不出朕所料柯
藩著革去頂帶官職暫留護理提督事務仍令帶領原兵戴罪自
贖烏爾圖納遜不能截住賊匪任其竄至漢中又不趕緊追勦轉

欲前赴四川梁山竟係心懷畏怯避難就易著革職作為兵丁交

宜縣德楊泰差遣○壬子胡高望卒以吳省欽為左都御史

侍郎由吏部左

選○乙卯諭內閣學士那彥成係翰林出身人尙明白且係原

任大學士阿桂之孫著在軍機處學習行走侍郎傅森著仍回戶

部辦事○曹汎壩工復整視司馬駒頂帶李奉翰康基田翎頂○

丙辰調劉權之為吏部右侍郎以戴衢亨為禮部右侍郎

由內閣學士遷

○丁巳諭軍機大臣等前令宜縣赴明亮軍營督辦軍務今思宜

縣究屬年老多病明亮在彼日久若將伊擊問轉少一人帶兵著

傳旨將明亮作為領隊帶兵聽宜縣調度此係朕於無可寬貸之

中格外施恩儻仍前因循則二罪俱發不能再邀曲貸又潼關商

雜一帶逼近豫境前倭什布派兵赴蒲州駐守著再添調兵丁湊

足二千親自帶赴蒲州防堵○辛酉 御試翰林詹事等官擢陳

琪等二員爲一等餘升黜留館有差○以成書爲內閣學士

由詹事遷

三月辛未改貴州平越府爲平越直隸州裁平越縣設興義縣於

興義府黃草壩○癸酉以景安爲湖廣總督調倭什布爲河南巡

撫以伯麟署山西巡撫

由兵部右副都御史署

○丙子以京師缺雨命刑部清

理庶獄○丁丑諭軍機大臣等德楞泰奏殲除首逆齊王氏姚之

富並將此股全行勦蕩覽奏欣悅但兩首逆均係情急投崖垂斃

雖經懲割示眾究未能生擒解京盡法處治不爲滿意計此時陝

省竄匪中緊要首逆係高均德李全其次卽張添文阮正通務須

按名設法生擒不可再令情急自斃倖逃顯戮○以殲首逆齊王

氏姚之富予明亮副都統銜花翎○辛巳諭軍機大臣等王三槐

徐添德冉文雋等合夥屯聚達州渠縣境內經勒保等沿途截勦

殺賊二千餘名所辦尙好該匪雖人數較多見在雲貴兵一萬名

不日卽到兵威極壯且齊姚二首逆業經殲斃賊匪聞信自形震懾勒保務趁此機會將各首逆速行擒獲不可專待雲貴兵到始行進剿至宜縣奏令明亮帶兵前赴興安一節此時剿捕情形究以高均德一股爲要若能將該逆擒獲其阮正通等窮竄之賊剿除自易此旨到時如明亮已拏獲高均德自可馳赴興安若正在喫緊追剿卽當與德楞泰奮力進擊將該犯速行拏獲再帶兵分赴宜縣秦承恩兩路剿辦○免四川教匪滋擾之長壽等十四州縣緩徵鄰近禦賊之閬中等十七廳州縣額賦○丁亥 上親耕藉田○戊子諭軍機大臣等張漢潮一股賊匪經宜縣沿途迎擊殲斃一千二百餘名賊仍折向通巴屯聚見宜縣已飭田有成等在峽口屯紮扼其入陝西要路至阮正通一股由鎮安折竄兩河關經參將李昌迎頭截擊不令竄入湖北宜縣慮其渡江回川飛

咨興肇柯藩繞出賊前堵截所辦尙是此時該匪既不能與高均德等合夥賊勢更孤惟當兩面夾擊迅速殄除又近聞川省領兵之員惟富成最爲奮勇州縣中則有劉清每率眾禦敵賊以伊爲廉吏往往引去可見文武員弁本不乏人此外有似此者勒保應隨時察看拔擢數人其帶兵怯懦及聲名平常者卽參劾治罪如此賞罰嚴明庶人知激勵於勦撫機宜大有裨益○己丑諭觀成劉君輔勦辦老木園賊匪已閱年餘迄未蕝事實屬玩誤遲延觀成著卽革職劉君輔著革去提督銜均仍留該處帶兵贖罪以觀後效所有成都將軍員缺卽著富成補授○辛卯諭軍機大臣等高均德一股賊匪經德楞額勒登保分路兜擊而明亮行至二峪河探知賊蹤不赴興安卽與德楞額合勦殺斃二千餘名又殲其頭目多人見在該逆逃入秦嶺深林德楞額等兩路兜勦務剋

期生獲解京至劉成棟一股在遠安南漳一帶奔竄無定景安帶兵無多派撥堵截尙能鎮靜見文圖由南漳截擊海興阿等自遠安追剿景安一俟兵齊卽當督率兜剿肅清楚境○撥部庫銀四百萬兩備江南軍需

夏四月乙未朔諭軍機大臣等秦承恩奏李全與阮正通合夥折回鎮安西竄漢陰石泉若再任折竄五郎乘閒北逸惟宜縣興肇柯藩是問至高均德一股屢經德楊泰等痛加剿殺何以又任其由渭南華州分投北竄德楊泰等並不繞赴賊前攔截復蹈從前尾追積習德楊泰明亮額勒登保著嚴行申飭其庫峪口剿敗餘匪經臬司台斐音勦洗淨盡所辦尙好秦承恩見在北路駐紮並著台斐音幫同防堵再觀成劉君輔前因剿辦老木園賊匪未能辦竣降旨黜革仍留該處帶兵自贖今閱所奏首逆仍未拏獲實

屬無能看來竟不足恃昨諭令富成前往督剿該將軍當倍加感奮及早蕝事○己亥諭軍機大臣等景安一聞賊匪北竄卽與高杞設法布置能以少擊多殲賊多名深爲可嘉見在陝省賊匪勢已窮蹙該處帶兵大員多人額勒登保興肇俱著速赴荊州一帶幫同景安勦辦再賊匪係由川東竄入楚境前此勒保會派富森布六十七帶兵勦捕何以至今未見下落或竟在他處逗留惟知驅賊出境以鄰國爲壑則其罪甚重著勒保據實查奏其高均德一股係德楊泰明亮二人專責若再不知奮勉曠日持久必當從重治罪○癸卯湖北巡撫汪新卒照總督例賜卹諡勤僖○以高杞爲湖北巡撫李殿圖爲福建布政使劉斌爲福建按察使由浙江溫處道遷○庚戌以平恕爲內閣學士由詹事遷○庚申實授伯麟山西巡撫○癸亥諭軍機大臣等李全阮正通二股賊匪本由川省竄入

陝境今仍復任其折竄回川實屬疏縱秦承恩與肇王文雄柯藩俱著嚴行申飭至高均德一股竄入老林藏匿勢已窮蹙何以又任其竄入陝省腹地再富成見在勦辦王三槐大夥賊匪難以分身勒保已派德齡馳赴老木園督勦該鎮務須親身督率速將陳崇德擒獲不可又如觀成劉君輔遷延貽誤又據秦承恩奏陝省賊匪漸近整屋一帶王文雄斷難分身赴楚景安務須與與肇額勒登保等鼓勇進剿將賊首劉成棟張漢潮等速行擒獲或仍竄回川境額勒登保仍應迅速赴川協剿

五月丙寅免福建全省遠年通糧○己巳截留江西漕米四十萬石接賑山東曹縣等十三州縣衛水災○甲戌 上侍 太上皇帝啓鑾秋獮木蘭○免經過地方額賦十分之四○乙亥免陝西教匪滋擾之藍田十九廳州縣上年額賦寶雞等二十五廳州縣

額賦再緩徵南鄭等四十七州縣元年額賦○庚辰 上侍 太

上皇帝駐蹕避暑山莊○丙戌撥內庫銀二百萬兩備陝西軍需

○庚寅以台費蔭爲兵部右侍郎由護軍統領還那彥成爲工部右侍郎

由內閣學士還○辛卯諭觀成劉君輔此次帶兵追賊首逆陳崇德被勦

緊急自行截傷斃命餘匪悉就殲除所辦尙好雖伊等攻勦此股

賊匪將近兩年此時始行勦竣不足爲功但伊二人於德齡未到

之前能自知愧勵將賊巢攻克尙爲奮勉觀成劉君輔俱著加恩

賞給頭等侍衛以示獎勵

六月癸巳朔諭軍機大臣等長麟等奏薩木薩克輸誠向化懇請

內投一摺覽奏俱悉薩木薩克係回部嫡裔該處布魯特向俱借

其名目搖惑眾聽今因通竄日久窮蹙無依而各布魯特又聞喀

什噶爾有調兵之信不敢與之勾結經長麟等曉諭令其內投可

期永除餘孽回疆益臻甯謐實屬極好機會見在薩木薩克已令其爲首辦事之邁瑪特尼牙斯齊遞表文稟帖並力辨上年並無糾眾滋擾之事自係威畏出於真誠此時自不必深詰但其表文內止令伊子先行進京瞻覲俟伊子由京回至鄂羅退帖後再帶家口同來雖據邁瑪特尼牙斯稟稱會與彼抱經起誓未必不存疑畏長麟等嚴加駁斥已令邁瑪特尼牙斯復往飭諭令攜眷同來薩木薩克如果傾心向化遵照親來長麟等自當派委委員迎出卡倫分起照管將薩木薩克父子俱行送京安插○丁未諭軍機大臣等宜縣奏陝省後股賊匪勦洗淨盡首逆張添倫業經淹斃但高均德李全等仍任竄入川省迄未擊獲實屬無能宜縣德楞泰明亮等勦辦高均德等賊匪已逾兩年強兵勁旅亦皆在此一路乃惟知跟蹤追擊任賊匪往來奔竄似此年復一年何日始

能辦竣豈竟欲待賊匪自斃耶見在德榜奏已馳赴廣元務須繞前兜剿卽將高均德李全擊獲若賊首已與阮正通冉文儔合夥明亮尤當速赴川境同德榜秦奮勇直前將首逆一併擒獲卽帶勁兵與勒保併力搜捕各股賊匪毋得仍事尾追致兵丁疲乏賊得他竄自干重戾○撥山西河南藩庫銀各三十萬兩備甘肅軍需○己酉諭德榜奏前此剿辦賊匪遷延貽誤本與明亮同罪因明亮列名在前是以未將德榜秦一體治罪今伊追剿高均德等一股賊匪未能卽行擒獲又任竄入川境是其種種遲誤之罪與明亮相埒德榜秦亦著將御前侍衛署領侍衛內大臣都統一併革去仍留副都統職銜戴罪圖功以觀後效○甲寅雲貴總督三等男鄂輝卒予祭葬入祀賢良祠諡恪靖以其子鄂彌善襲○以富綱爲雲貴總督梁肯堂爲漕運總督董誥署刑部尙書○勒保

奏剿除川匪龔懷仁全夥○丁巳諭軍機大臣等景安等追剿竹
溪一股賊匪已除三分之二而賊匪仍由竹溪竄入陝省平利縣
境豈非驅入鄰境所辦何事景安額勒登保興肇著傳旨嚴行申
飭前據宜縣奏業於洵陽平利一帶派兵堵截今賊匪竄入平利
之鎮坪地方正可迎頭截擊何以未據宜縣奏報而景安摺內亦
未提及見在額勒登保興肇已帶兵三千餘名由鎮坪入陝追剿
當與宜縣兩面夾攻若再任蔓延陝境伊等自思當得何罪至川
匪王三槐等夥黨一股見已竄入大甯難保不闖入房縣歸巴一
帶景安已帶兵馳往攔截並令文圖等分路嚴防務須實力堵截
勿再任竄入楚界慎之至勒保勦辦川東賊匪仍任王三槐徐添
德等竄合一處今又任賊匪由大甯一帶分竄似此往來竄擾何
日始能剿竣勒保亦著嚴行申飭見在勒保已赴開縣督兵進剿

並令觀成等於大甬奉節一帶迎截務須策勵雲貴新兵鼓勇直前將各股竄匪一律殲除毋任復竄楚陝勒保係總統大員所有陝楚各股賊匪皆應通盤籌畫悉心調度豈得專管川省一路而各省竄匪聽各省自行勦辦以致彼此各不相顧東擊西奔迄無成功如此又安用總統爲耶今將各路帶兵大員爲之分定責成陝省令宜縣與額勒登保與肇爲一路專勦見竄平利之劉成棟等一股楚省令景安與王凱文圖爲一路專堵見欲竄入楚境之川東賊匪惠齡德楞泰等勦辦李全高均德阮正通等賊匪如已與冉文儔羅其清合夥則惠齡恆瑞明亮德楞泰作爲一路併力兜擊若賊首等尙在不分竄則惠齡恆瑞專勦冉文儔等一股明亮德楞泰專勦李全高均德等一股如此則各勦各股庶責有攸歸無可諉卸而勒保勦辦王三槐等一股賊匪仍當察探各路賊

情相機布置爲之聲援策應不拘何路能將賊首拏獲俱係總統之功若賊匪由何路竄逸不特此一路領兵大員責有攸歸卽總統亦無可諉罪而各路領兵大員仍不得推卸總統稍有觀望必須各加策勵合力堵剿賊匪方不至往來奔竄若各股賊匪於何路逸出卽惟該路領兵大員是問經此番訓諭之後若仍前觀望不知同心協力奮勉圖功必將伊等從重治罪再不能曲爲寬貸也○辛酉撥部庫銀一百萬兩備湖北軍需